

Naalagaaffiit Peqatigiit Meeqqat Pisinnaatitaaffii pillugit Isumaqatigiissutaata malinneqarnissaanut iliuusissatut pilersaarummik 2023-mit 2030-mut atuuttussamik nutaamik Naalackersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Eqaluk Høegh, Inuit Ataqatigiit)

Nunatsinni meeqqat inuusuttullu kommunini tamani suliassanngortitat annertuumik navianartorsiortut nalunaarsorneqarsimallutik inissisimasut kiisalu meeqqat inuusuttullu pillugit suliat suliarineqarsimannigitsut pillugit kommunit peqatigalugit Naalackersuisut immikkut annertusisamik iliuseqarnissaannik peqquneqarnissaannut Inatsisartut aalajangiiffigisassaattut siunnersuut.

(Inatsisartunut ilaasortaq, Eqaluk Høegh, Inuit Ataqatigiit)

Akissuteqaat

(Meeqqanut, Inuusuttunut Ilaqutariinnullu Naalackersuisoq)

Siullermeerneqarnera

Naalackersuisut aalajangiiffigisassatut siunnersuutit marluk pingaarutillit pillugit siunnersuuteqartoq Eqaluk Høegh qujaffigaat.

Meeqqat inuusuttullu tamarmik toqqissisimasumik peroriartornissaat Naalackersuisut ukkataraat. Meeqqat pisinnaatitaaffiisa malinneqarnissaat inersimasut akisussaaffigaat. Taanna akisussaaffik Naalackersuisuni salliullugulu pimoorutaraarput. Akisussaaffik paarilluarutsigu meeqqat pitsaasumik toqqissisimasumillu peroriartortissavagut. Pitsaasumik peroriartorneq pitsaasumik inuusuttuunissamik inersimasuunissamillu tunngaviliisuusarpoq. Nunatsinni meeqqat tamaasa pillugit taamaasiortariaqarpugut.

Suliatsinni peqataatitsineq ingerlataqarfinni assigiinngitsuni tamani Naalackersuisutut pingaartitannut ilaavoq. Taamaattumik Naalackersuisuni isumaqarpugut suliatsinnut attuumassuteqartunut tamanut peqataatitsinissaq ukkataralugu suliatsinnik pitsanngorsaajuaannarsinnaalluta. Meeqqat Pisinnaatitaaffii pillugit Naalagaaffiit Peqatigiit Isumaqatigiissutaannik eqquutsitsinissamut iliuusissatut pilersaarummik suliaqarnermi isummersuutit kommunini tallimanit tamanit ataatsimeeqateqarnernit pissarsiarineqarnikuupput assersuutigalugu isumaginninnermik ingerlatsivinniit, ilaqutariinnik katsorsaavinniit, innarluutilinnik ingerlatsivinniit aamma ulluunerani neqerooruteqartuninngaanniit. Taakkua saniatigut Nakuusami Meeqqat Isummersorfii ilanngunneqarput taamatuttaarlu Meeqqat Illersuisoqarfiat ataatsimeeqatigisarneratigut saqqummiussaannillu atuisarnikkut ilaatinneqarluni. Tamatuma saniatigut meeqqat inuusuttullu pillugit suliassaqarfinni suliaqartuniit peqatigiiffinnit arlaqartunit allakkatigut isummersuutitik Naalackersuisut tusarniaanikuupput.

Naalackersuisut isumaqatigivaat meeqqat inuusuttullu pillugit suliassanik suliarinnittarnernik pitsanngorsaasoqarnissaanut annertuumik pisariaqartitsisoqartoq. Meeqqat inuusuttullu pillugit suliassat suliarineqarsimannigitsut suli amerlangaatsiarput kisitsisillu appartinneqarnissaannut pisariaqartitsineq suli annertuvoq. Immikkut annertusisamik suliniuteqarneq ingerlanneqalereernikuuvoq suliassallu suliarineqarsimannigitsut ikiliartuaarneri *Kalaallit Nunaanni meeqqanut inuusuttunullu atugarliortunut pitsaanerusumik suliniuteqarnissaq*

pillugu kalaallit qallunaallu oqartussaasoqarfiisa assigiinngitsunik suliallit akornanni suleqatigiinnerup killiffia pillugu nalunaarusiami takuneqarsinnaavoq.

Naalackersuisut 2020-mi suliniutinik pingasunik saqqummersitsinikuupput, taakkua suliniutit tamarmik ukkatarivaat meeqqat atugarissaarnissaat eqqarsartaatsikkullu peqqissuunissaat. Suliniutit pingasut tassaapput: Ilaqutariinnermut Politikki, Inuuneritta III aamma Angajoqqaat meeqqanik sumiginnaasarnerat akiorniarlugu Nuna tamakkerlugu iliuusissatut pilersaarut 2020-2030. Suliniutit pingasut taakkua atulersinnerat atulersinnissaallu maannakkorpiaq Naalackersuisut sulissutigileruttorpaat.

2022-mi Inatsisartut Ukiakkut ataatsimiinneranni Meeqqat Pisinnaatitaaffii pillugit Naalagaaffiit Peqatigiit Isumaqatigiissutaannik eqquutsitsinissamat iliuusissatut pilersaarutit saniatigut Naalackersuisut Pitsaaliuineq pitsaanerusoq, inissiinerit ikinnerusut: 2023-2030-mi ilaqutariinni pitsaaliuinermit sulineq pillugu iliuusissatut pilersaarummik saqqummersitsipput. Tamatumalu saniatigut matumani upernaakkut ataatsimiinnermi Qanigisariinni nakuusertarnerup akiorneqarnissaanut iliuusissatut pilersaarut 2023-2030 aamma Suli atualinngitsunut suliaasaqarfimmud periusissiaq: Meeraaneq nalitooq 2023-2030 Naalackersuisut saqqummiutissavaat, kiisalu septemberimi 2023-mi Inuit Innarluutillit Pisinnaatitaaffii pillugit Naalagaaffiit Peqatigiit Isumaqatigiissutaannik eqquutsitsinissamat iliuusissatut pilersaarut 2024-2034 Naalackersuisut aamma saqqummersissavaat. Taakkua tamarmik Naalagaaffiit Peqatigiit meeqqat pillugit isumaqatigiissutaannik annertunerusumik malinneqalernissaanut sunneeqataassapput.

Naalackersuisut isumaqarput iliuusissatut pilersaarutini aallartitani suliniuterpasuit pisariaqarluinnartut, taakkualu meeqqat pisinnaatitaaffii pillugit Naalagaaffiit Peqatigiit Isumaqatigiissutaannik annertunerusumik Kalaallit Nunaata eqquutsitsinissaanut tunngaviliisooqataalluinnartut. Taakkualu suliniutit ingerlatiinnassavagut.

Naalackersuisut isumaqataapput Meeqqat Pisinnaatitaaffii pillugit Naalagaaffiit Peqatigiit Isumaqatigiissutaannik eqquutsitsinissamat iliuusissatut pilersaarut 2023-2030-mik suliaqartoqarnerani amerlanerusunik peqataatitsisoqarsinnaasimasooq taamaasilluni peqataatitsiniarnermut sulineq naapertuunnerulersinnaalluni. Peqataatitsinerunermi kommunimipolitikerinik, Inatsisartunik ilaatigut Ilaqutariinnermut Peqqissutsimullu Ataatsimiititaliamik minnerunngitsumillu meeqqanik peqataatitsisoqarsinnaavoq. Peqataatitsineq pissaaq ukioq 2023 ingerlanerani, tassani iliuusissatut pilersaarut aallaavigineqarumaarpoq.

Iliuusissatut pilersaarutini ingerlanneqartuni suliniuteqartoqaraluartooq peqataatitsinermullu sulisoqaraluartooq annertunerusumik peqataatitsisoqarnerusariaqartoq aamma meeqqat inuusuttullu pillugit suliaannik suliarinnittarneni immikkut ittumik suliniutinik pilersitsisoqassasooq aalajangiinissamat siunnersuutit erseqqissaapput.

Naalackersuisut taamatut oqaaseqarlutik allannguutissatut siunnersuut manna saqqummiuppaat:

Naalagaaffiit Peqatigiit Meeqqat Pisinnaatitaaffii pillugit Isumaqatigiissutaata malinneqarnissaanut iliuusissatut pilersaarummik nutartikkamik 2023-mit 2030-mut atuuttussamik Naalackersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.

Iliuusissatut pilersaarut kingusinnerpaamik ulloq 1. maj 2024 kikkunnut tamanut saqqummiunneqassaaq.

Meeqqat inuusuttullu pillugit suliani immikkut annertusisamik iliuuseqartoqareemat aalajangiiffigisassatut siunnersuutip akuerineqarnissaanik Naalackersuisut inassuteqarput.

Taakkua saniatigut ilassutigerusupparput Naalackersuisut kissaatigimmassuk iliuusissatut pilersaarut nutaaq piareerpat, politikikkut ataatsimut iliuusissatut pilersaarutip qanoq pitsaanerpaamik atuutsilersinneqarsinnaanera oqallisigerusukkatsigu.